

ekster la vestoĉambrojn, ke Ron kaj Hermiona demandis al si, ĉu ili denove vidus lin viva. Tio ne estis aparte trankviliga. Hari apenaŭ aŭdis unu vorton de la instiga parolado de Arbo, dum li surmetis sian kvidiĉan robon kaj prenis sian Nimbuson 2000.

Dume Ron kaj Hermiona trovis en la benkaro sidejojn apud Nevil, kiu ne komprenis kial ili aspektas tiel grave kaj maltrankvile, aŭ kial ambaŭ kunportis siajn vergojn al la matĉo. Hari tute ne sciis, ke Ron kaj Hermiona estis sekrete ekzercintaj sin en la uzo de la Krur-Krampa Malbeno. Malfid havigis al ili la ideon, kiam li uzis ĝin kontraŭ Nevil, kaj ili estis pretaj uzi ĝin kontraŭ Snejp, se li montris ajnan intencon damaĝi Hari.

“Nu, ne forgesu, ĝi estas *Lokomotor Mortis*,” Hermiona murmuris dum Ron kaŝis sian vergon en la manikon.

“Mi *scias* tion,” Ron knalis. “Ne tedu min.”

Dume en la vestoĉambro Arbo parolis diskrete kun Hari.

“Mi ne intencas puŝi vin, Potter, tamen, se ni iam ajn bezonis fruan kapton de la oreko, estas nun. Por fini la matĉon antaŭ ol Snejp havas la tempon por favori Hupopufon multe.”

“La tuta lernejanaro estas tie ekstere!” diris Fredo Tordeli, spionante el la pordo. “Eĉ – mirinde! – Zomburdo ĉeestas!”

La koro de Hari eksaltis.

“*Zomburdo*?” li diris, kurante al la pordo por certigi tion. Fredo pravis. Neniu povus malrekoni tiun arĝentecan barbon.

Hari povis laŭtridi pro sento de malŝarĝo. Li estas sekura. Snejp tute ne kuraĝus damaĝi lin dum Zomburdo rigardas.

Eble pro tio Snejp aspektis tiel kolere dum la teamoj marŝis sur la terenon, kion ankaŭ Ron rimarkis.

“Mi neniam vidis Snejp aspekti tiel malice,” li diris al Hermiona. “Rigardu – oni ekas. Aĵi!”

Iu frapis Ron al lia kapa malantaŭo. Estis Malfid.

“Ho, pardonu min, Tordeli, mi ne vidis vin tie.”

Malfid ridis larĝe al Krab kaj Klus.

“Mi scivolas, kiel longe Potter restos sur sia balailo hodiaŭ? Ĉu iu dezirus veti? Eble vi, Tordeli?”

Ron ne respondis. Snejp ĵus aljuĝis penalan ŝoton al Hupopufo, ĉar Georgo Tordeli batis klubumon kontraŭ li. Hermiona, kiu krucigis en la sino ĉiujn el siaj fingroj por bonŝanco, fiksrigardis Hari rondiri kiel falko kaj serĉi la orekon.

“Ĉu vi scias mian opinion pri la elekto la teamanoj por Oragrifo?” diris Malfid laŭte post kelkaj minutoj, dum Snejp aljuĝis alian penalan ŝoton al Hupopufo por neniu kialo. “Temas pri kompatindaj homoj. Vidu, jen tiu